

Cylch Gorchwyl

Grŵp Gorchwyl a Gorffen

Y Cynllun Datrysiadau y Tu Allan i'r Llys

Deddf Plant (Diddymu Amddiffyniad Cosb Resymol) (Cymru) 2020

Cafodd y cylch gorchwyl hwn ei lunio am y tro cyntaf tra bo'r Bil yn mynd drwy'r Senedd; mae bellach wedi'i ddiweddarau, yn dilyn Cydsyniad Brenhinol, i gyfeirio at y Ddeddf a'r amserlen ar gyfer ei chychwyn.

Cefndir

Cyflwynwyd Deddf Plant (Diddymu Amddiffyniad Cosb Resymol) (Cymru) 2020 (y Ddeddf) i'r Senedd ar 25 Mawrth 2019 a chafodd Gydsyniad Brenhinol ar 20 Mawrth 2020. Amcan cyffredinol y Ddeddf yw helpu i ddiogelu hawliau plant drwy wahardd cosbi corfforol gan rieni a'r rhai sy'n gweithredu in loco parentis. Mae Confensiwn y Cenhedloedd Unedig ar Hawliau'r Plentyn (UNCRC) yn cydnabod bod unrhyw fath o gosbi plant yn gorfforol, ni waeth pa mor ysgafn, yn anghydnaws â'u hawliau dynol o dan Erthygl 19, ac mae wedi galw am iddo gael ei ddiddymu.

Pan ddaw'r Ddeddf i rym ar 21 Mawrth 2022, ni fydd amddiffyniad cosb resymol ar gael bellach yng Nghymru i rieni na rhai sy'n gweithredu in loco parentis, fel amddiffyniad i gyhuddiad o ymosod cyffredin neu guro.

Yr effaith y bwriedir y Ddeddf i'w chael, ynghyd â chodi ymwybyddiaeth a chefnogi rhieni, yw peri bod llai o gosbi plant yn gorfforol yn digwydd yng Nghymru a bod llai o oddefgarwch tuag ato.

Mae Llywodraeth Cymru wedi sefydlu Grŵp Gweithredu Strategol i ystyried y ffordd orau o roi'r Bil ar waith. Bydd nifer o ffrydiau gwaith, gan gynnwys cynlluniau datrysiadau y tu allan i'r llys.

Diben y Grŵp

Diben y grŵp yw darparu cyngor ac argymhellion ynghylch opsiynau ar gyfer datblygu a defnyddio cynllun datrysiadau y tu allan i'r llys, ar gyfer unigolion sydd o bosib wedi cael eu cyhuddo o ymosodiad cyffredin neu guro plentyn, dan amgylchiadau pan fyddai'r amddiffyniad cosb resymol wedi bod yn gymwys cyn i'r Ddeddf gychwyn. Bydd y Grŵp yn cynnig cyngor strategol i Lywodraeth Cymru ynghylch caffael, ariannu a neilltuo adnoddau mewn perthynas ag unrhyw gynllun datrysiadau posibl.

Y bwriad fyddai sicrhau fod proses yn ei lle i ganiatáu ar gyfer ymateb cymesur er budd y plentyn, gan ystyried amgylchiadau pob achos yn unigol. O ran cynllun datrysiadau posibl, y nod fyddai ystyried y system datrysiadau y tu allan i'r llys y gellid cyrraedd at gynllun o'r fath drwyddo, a darparu cynllun a fyddai'n helpu rhieni a'r rhai sy'n gweithredu in loco parentis i fabwysiadu ffyrdd cadarnhaol o ddisgyblu ac osgoi'r perygl o ail-droseddu. Byddai angen i unrhyw gynllun datrysiadau fod yn

gyson ag egwyddorion/canllawiau gweithredol a strategol y mae'r heddlu yn eu dilyn ar hyn o bryd (ee yr hyn a gyhoeddwyd gan y Swyddfa Gartref; y Weinyddiaeth Gyfiawnder a Chyngor Cenedlaethol Penaethiaid yr Heddlu).

Trefniadau Llywodraethiant

Bydd y grwp Gorchwyl a Gorffen yn atebol i'r Grŵp Gweithredu Strategol, ac yn cael ei gyd-gadeirio gan aelod o'r grŵp a swyddog Llywodraeth Cymru. Bydd cyd-gadeirydd Llywodraeth Cymru yn rhoi'r wybodaeth ddiweddaraf i'r Grŵp Gweithredu Strategol ar ôl pob cyfarfod ac ar adegau priodol drwy gydol y prosiect.

Amserlenni a Dyddiadau Pwysig

Cynhaliwyd cyfarfod cyntaf y Grŵp ar 11 Gorffennaf 2019. Rhagwelir y bydd y grŵp yn cyfarfod yn chwarterol ond mae'n bosibl y bydd cyfarfodydd ychwanegol yn cael eu cynnal i ganiatáu ar gyfer trafod a chynllunio tasgau allweddol. Dylai gwaith y Grŵp fod wedi'i gwblhau mewn pryd i sicrhau bod y canllawiau, hyfforddiant ac unrhyw gynllun datrysiadau yn eu lle cyn i'r gyfraith ddod i rym.

Mae'r amserlen hon yn debyg o newid wrth i'r gwaith fynd rhagddo, ac mae'n bosibl hefyd y bydd y pandemig COVID-19 yn effeithio arni.

Tasgau a dyddiadau allweddol ar gyfer y grŵp	
Mapio'r seilwaith presennol ar gyfer Cynlluniau Datrysiadau y Tu Allan i'r Llys yng Nghymru	Diwedd Medi 2019
Datblygu opsiynau ar gyfer cynlluniau datrysiadau y tu allan i'r llys, gan gynnwys unrhyw gymorth priodol a ddarperir fel rhan o'r cynlluniau	Diwedd Ionawr 2020
Penderfynu ar opsiwn i'w ddilyn a datblygu manylion penodol y cynllun a'r broses gysylltiedig	Diwedd Mehefin/Gorffennaf 2020
Cychwyn y Broses Gaffael	Medi 2020
Gorffen y Broses Gaffael	Mai 2021
Datblygu canllawiau a hyfforddiant	Diwedd Tachwedd 2021
Canllawiau a hyfforddiant yn eu lle	Diwedd Ionawr 2022
Cynllun datrysiadau yn weithredol	Mawrth 2022
Gwerthuso'r cynllun	I'w gadarnhau

Rolau penodol yr Aelodau a Llywodraeth Cymru

Daw'r aelodau o amrywiol sefydliadau sydd â buddiant neu ddealltwriaeth allweddol o ddatblygu cynlluniau datrysiadau y tu allan i'r llys a goblygiadau gwyro oddi wrth erlyniad.

Bydd gofyn i aelodau fonitro'r hyn sy'n cael ei gyflawni yn erbyn cerrig milltir allweddol, a darparu arbenigedd yn y meysydd canlynol:

- sut y gallai cynllun datrysiadau gael ei weithredu
- gwneud argymhellion o ran penderfyniadau ar drefniadau cyllid ac adnoddau
- systemau cymeradwyo cynllun datrysiadau; y dulliau cyflawni mwyaf priodol a champau gweithredu cysylltiedig fel diweddarau canllawiau a hyfforddiant; rheoli'r cynllun
- sut gall amrywiol ddatrysiadau y tu allan i'r llys effeithio ar gofnod troseddol unigolyn
- canllawiau ar broses sicrhau ansawdd a fydd yn hybu cysondeb o ran penderfyniadau a chyflawni mewn perthynas â'r cynllun datrysiadau
- cyngor ynghylch arbenigedd technegol i'w gyfethol i'r grŵp er mwyn cefnogi'r rhaglen waith, pan fo'n ofynnol.

Bydd Llywodraeth Cymru yn darparu:

- Cymorth polisi ac arbenigedd
- Ysgrifenyddiaeth, cefnogaeth weinyddol a threfniadau ar gyfer y cyfarfodydd a gwaith y grŵp;
- Yr wybodaeth ddiweddaraf gan y Grŵp Gweithredu Strategol a'r grwpiau gorchwyl a gorffen eraill ym mhob cyfarfod
- Papurau o fewn 5 diwrnod gwaith cyn pob cyfarfod.

Aelodaeth

Bydd aelodau'r grŵp Datrysiadau y Tu Allan i'r Llys yn cynnwys:

Sefydliad	
Gwasanaeth Erlyn y Goron Cymru	Y Gwasanaeth Datgelu a Gwahardd
Gwasanaeth Llysoedd a Thribiwnlysoedd Ei Mawrhydi	Cymdeithas Cyfreithwyr Cymru
Heddlu Cymru	Comisiynwyr Heddlu a Throseddu Cymru
Cymdeithas Cyfarwyddwyr Gwasanaethau Cymdeithasol Cymru	Llywodraeth Cymru

